

## 大珠禪師語錄選輯

師越之建州人，依越州大雲寺道智和尚受具足戒，法號慧海。初至江西參馬祖，祖問來此何事？曰：求佛法。祖曰：自家寶藏不顧，拋家散走作什麼？師遂禮拜問：那個是慧海自家寶藏？祖曰：即今問我者是，一切具足，何假外求。師言下大悟，識自本心，不由知覺，遂禮謝師，師事六載。

禪宗本來是教外別傳，不立文字；甚至有『念佛一聲，漱口三日』之傳說。而此禪師於諸答問，雖演機鋒，但以經律論為依據，且以深入顯出開示；且所示者，均為佛教徒應有之共識，故選輯以供讀者。

### （一）金剛經是誰說

有法師數人來謁曰：擬伸一問，師還對否？師曰：深潭月形，任意揣摩。問：如何是佛？師曰：清潭對面，非佛而誰。眾皆茫然，良久，其僧又問：師說何法度人？師曰：貧道未曾有一法度人。曰：禪師家法如此。師卻問曰：大德說何法度人？曰：講金剛般若經。師曰：講幾座來？曰：二十餘座。師曰：此經是阿誰說？僧抗聲曰：禪師相弄，豈不知是佛說耶？師曰：若言如來有所說法，則是謗佛，是人不解我所說義。若言此經不是佛說，則是謗經，請大德說看。僧無對，師少頃又問：經云：若以色見我，以音聲求我，是人行邪道，不能見如來。大德且道，阿那個是如來？曰：某甲到此卻迷去。師曰：從來未悟，說什麼卻迷。僧曰：請禪師為說。師曰：大德講經二十餘座，卻不識如來。其僧再禮拜，願垂開示。師曰：如來者，是諸法如義，何待忘卻？曰：是、是諸法如義。師曰：大德是亦未是。曰：經文分明，那得未是？師曰：大德如否？曰：如。師曰：木石如否？曰：如。師曰：大德如，同木石如否？曰：無二。師曰：大德與木石何別？僧無對，乃嘆云：此上人者，難為酬對。良久卻問，如何得大涅槃？師曰：不造生死業。對曰：如何是生死業？師曰：求大涅槃，是生死業。捨垢取淨，是生死業。有得有證，是生死業。不脫對治門，是生死業。曰：云何得解脫？師曰：本自無縛，不用求解，直用直行，是無等等。僧曰：如禪師和尚者，實為希有，禮謝而去。

### （二）三學

問：何者是三學？答：三學者，戒定慧也。問：其義云何？答：清淨無染是戒。知心不動，對境寂然，是定。知心不動時，不生不動想；知心清淨時，不生清淨想；乃至善惡皆能分別，於中無染，得自在者，是名為慧也。

### （三）五身

問：方廣經云：五種法身，一、實相法身，二、功德法身，三、法性法身，四、應化法身，五、虛空法身。於自己身何者是？答：知心不壞，是實相法身。知心含萬象，是功德法身。知心無心，是法性法身。隨根應說，是應化法身。知心無形不可得，是虛空法身。若了此義者，即知無證也。無得無證者，即是證佛

法法身，若有證有得，以爲證者，即邪見增上慢人也，名爲外道。何以故？維摩經云：舍利弗問天女曰：汝何所得？何所證辯？乃得如是。天女答曰：我無得無證，乃得如是，若有得有證，即於佛法中，爲增上慢人也。

#### （四）等覺與妙覺

問：經云等覺妙覺：云何是等覺？云何是妙覺？答：即色即空，名爲等覺。二性空故，名爲妙覺。又云：無覺無無覺，名爲妙覺也。

#### （五）五眼

問：如來五眼者何？答：見色清淨，名爲肉眼。見性清淨，名爲天眼。於諸色境，乃至善惡，悉能微細分之，無所染著，於中自在，名爲慧眼。見無所見，名爲法眼。無見無無見，名爲佛眼。

#### （六）大乘最上乘

問：大乘最上乘，其義云何？答：大乘者，是菩薩乘。最上乘者，是佛乘。又問：何修而得此乘？答：修菩薩乘者，即是大乘。證菩薩乘，更不起觀，至無修處，湛然常寂，不增不減，名最上乘，即是佛乘也。

#### （七）定慧等用

問：涅槃云：「定多慧少，不離無明，定少慧多，增長邪見，定慧等故，即名解脫。」其義如何？答：對一切善惡，悉能分別，是慧。於所分別之處，不起愛憎，不隨所染，是定；即是定慧等用也。

#### （八）言語道斷心行處滅

問：經云：言語道斷，心行處滅，其義如何？答：以言顯義，得義言絕，義即是空，空即是道，道即是絕言，故云言語道斷。心行處滅，謂得義實際，更不起觀，不起觀故，即是無生：以無生故，即一切色性空，色性空故，即萬緣俱絕，萬緣俱絕者，即是心行處滅。

#### （九）如如

問：如如者云何？答：如如是不動義，心真如故，名如如也。是知過去佛，行此行亦得成道；現在佛，行此行亦得成道；未來佛，有此行亦得成道；三世所修證道無異，故名如如也。維摩經云：諸佛亦如也，至於彌勒佛亦如也，乃至一切眾生。悉皆如也。何以故？爲佛性不斷，有性故也。

#### （十）受佛戒

問：菩薩戒云：眾生受佛戒，即入諸佛位，位同大覺已，真是諸佛子。其義云何？答：佛戒者，清淨心是也。若有人發心修行清淨行，得無所受心者，名受佛戒也。過去諸佛，皆修清淨無受行，得成佛道。若今有人，發心修無受清淨行者，即與諸佛功德等用無有異也。故云入諸佛位也。

#### （十一）常不離佛

問：云何是常不離佛？答：心無起滅，對境寂然，一切時中，畢竟空寂，即是常不離佛。

#### （十二）無為法

問：何者是無爲法？答：有爲是。問：今問無爲法，因何答有爲是。答：有

因無立，無因有顯，本不立有，無從何生。若論真無爲者，即不取有爲，亦不取無爲，是真無爲法也。何以故？經云：若取法相，即著我人，若取非法相，即著我人：是故不應取法，不應取非法，即是取真法也。若了此理，即真解脫，即會不二法門

### （十三）無證無無證

問：修道者以何爲證？答：畢竟證爲證。問：云何是畢竟證？答：無證無無證，是名畢竟證。問：云何是無無證？答：於外不染色聲等，於內不起妄念心，得如是者，即名爲證。得證之時，不作得證想，即名無證也。得此無證之時，亦不得作無證想，是名無證。即名無無證也。

### （十四）即心即佛

有行者問：即心即佛，那個是佛？師云：汝疑那個不是佛，指出看。無對。師曰：達即遍境是，不悟永垂疏。

### （十五）消業障

人問：一心修道，過去業障，得消滅否？師曰：不見性人，未得消滅。若見性人，如日照霜雪；又見性人，猶如積草等須彌山，只用一星之火，業障如草，智慧似火。曰：云何知業障盡？師曰：現前心通，前後生事，猶如對見。

### （十六）住正法與作佛

有行者問：云何得住正法？師曰：求住正法者是邪，何以故？法無邪正故。曰：云何得作佛去？師曰：不用捨眾生心，但莫污染自性。經云：心佛及眾生，是三無差別。曰：若如是解者，得解脫否？師曰：本自無縛，不用求解。

### （十七）度眾生

問：般若經云：度九類眾生，皆入無餘涅槃。又云：實無眾生得滅度者。此兩段經文，如何通會前後？人說皆云實度眾生，而不取眾生相，常疑未決，請師爲說。師曰：九類眾生，一身具足，隨造隨成。是故無明爲卵生，煩惱包裡爲胎生，受水浸潤爲溼生，倏起煩惱爲化生，餘類類此應知。悟即是佛，迷號眾生。菩薩只以念念心爲眾生，若了念念，心體俱空，名爲度眾生也。智者於自本際上，度於未形，未形既空，即知實無眾生得滅度者。

### （十八）見性

問：云何得見性？師曰：見即是性，無性不能見。

### （十九）修行

問：如何是修行？師曰：但莫汙染自性，即是修行。莫自欺誑，即是修行。大用現前，即是無等等法身。

### （二十）法身

問：何者是法身，師曰：心是法身，謂能生萬法故，號法界之力。起信論云：所言法者，謂眾生心，即依此心，顯示摩訶衍義。

### （二十一）般若之大小

人問般若大否？師曰：大。曰：幾許大？師曰：無邊際。曰：般若小否？師曰：小。曰：幾許小？師曰：看不見。曰：何處是？師曰：何處不是？